



IOannes à teneris annis operam literis dedit, atque artium & linguarum fundamentis feliciter iactis, hinc inde in Germaniæ academijs Theologiæ operam dedit, idq̃ tantò successu, ut inter præclari nominis Theologos meritò recenseatur. Itaque in Marpurgēsi Gymnasio professor sacrarum literarum constitutus, magna laude suam functionem peregit, atque principi Cattorum acceptissimus fuit. quin etiã in multis Imperij comitijs (præsertim Augustæ Vindelicorum Anno millesimo quingentesimo tricesimo) comparuit, atque cum aduersarijs de controuersis religionis articulis disputauit. Cum etiã Hebrææ linguę esset callentissimus,

aliquot ueteris Testamenti libros transtulit, & succinctis commentarijs explicauit: utpote Genesin, Psalterium Dauidicum, Danielem prophetam, et alia, atq̃ Marpurgi anno millesimo quingentesimo tricesimo septimo ædidi. Commentaria quoq̃ in Euangelia scripsit, et Catechismum religionis proposuit. Hoc modo factum, ut Draconites inter Theologos magnum sibi nomen compararit, atq̃ scholæ Marpurgensi ornamento fuerit. Tandem uerò ibidem obiit, & honorificè sepultus fuit. Conradus Lycost.